

Diabierna awor ta desvela e borchí di e Avenida na honor di Rudy Croes

DIABIERNA lo tuma luga un ceremonia caminda lo desvela e borchí di e Avenida na honor di Hyacintho Rudolfo (Rudy) Croes DFM y cual avenida ta cuminsa na Rotonde di Santa Cruz y termina te na Rotonde banda di ex Drive Inn. Rudy Croes a nace dia 5 di september 1946 y a fayece dia 20 di november 2021 y ta tata di 4 yiu.

Educacion

Rudy a sigui su educacion basico na Colegio San Hose y St. Tarcicius College y su educacion secundario MULO na Hulanda. Despues di esaki el a gradua na aña 1969 como analist na Analistenschool na Oss, Hulanda. Rudy tabatin su licencia piloto priva y a obtene certificadonan di PADI Divers, Papiamento Principiante y Papiamento Avansa.

Despues di su graduacion como analist na Hulanda, Rudy a traha den Microbiologia tanto na Oss, Hulanda como na Aruba (1969-1989 Landslaboratorium). Entre 1973-1974 el a traha tambe como Hefe Laboratorio y produccion Laboratorios LETI na Caracas, Venezuela.

Carera politico

Rudy Croes tabata para na cuna di fundacion di MEP na 1971. Den e eleccion di 6 di januari 1989 el a aparece pa prome biaha riba lista. El a keda como parlamentario y lider interino di fraccion for di 1989 te 1993. Despues di e eleccion na 1993 Rudy a asumi e encargo di Ministro di Husticia y Deporte y esaki te 1994.

Entre 1994-2001 e tabata miembro di Parlamento y tambe Presidente di Parlamento. Entre 2001 pa 2009 el a ocupa e funcion di Ministro di Husticia. Tambe Rudy tabata e prome Arubiano cu a fungi como Vice presidente di COPPPAL y na 2005 el a ser honra cu e titulo di 'Doutor Honoris Causa' pa e Facultad European Brazil.



Trabaonan boluntario

Den su trabaonan boluntario riba tereno social deportivo y cultural Rudy Croes tabata entre otro co-fundado y integrante den Grupo di Betico, campeon hubenil ping pong, ex Presidente di Volleyball Estrella, ex miembro di directiva di Aruba Volleyball Association, Aruba Lawn Tennis Bond, Aruba Sport Unie, CITRO, Korfbal Bionic, ex Presidente di Teen Princess Aruba, co fundado di STAR Volleyball team, co fundado y presidente di The Champs Tennis Club, co fundado di Harley Davidson Riders Club, co fundado "Aruba International Bike Week", "Betico Croes Memorial Ride" y organizado di caminata riba Dia di Santa Cruz (5 mei).

Proyecto y logronan

Como Ministro di Husticia den Gabinete Oduber 2, 3 y 4 Rudy a logra hopi proyecto na bienestar di nos comunidad: Guarda Costa (Kustwacht), Cuerpo Policial Aruba den 4 districto policial, construccion Centro di Husticia na Santa Cruz y Warda di Polis na Noord, Institucion di Guarda Nos Costa (GNC), Helicopter di Polis, Radarnan Raytheon, Flexteam, Visibility Teams, Night visors, sistema ultra moderno di Radex, IASA pa promove cu GNC, Inmigracion y Radar ta traha hunto

den combatimento di ilegalidad, reorganizacion di CEA.

Un Arubiano cu curashi y determinacion

Rudy como politico a traha cu hopi curashi y determinacion na bienestar di nos comunidad. E parti di seguridad pa nos pueblo y combatimento di ilegalidad tabata su gran pasion. E lista di tur su logronan riba e tereno aki ta papia pa su mes. No ta pornada cu ora el a asumi e encargo di Ministro di Husticia el a produci e documento cu a bira sumamente exitoso y cu a haya e nomber "Ordo Awor" y tambe "Faya bo haya".

Alabes Rudy desde hoben caba a para fielmente tras di e lucha di Status Aparte. Schouder cu schouder el a lucha hunto cu su ruman Libertador Betico Croes pa realisa e deseo sagrado di nos pueblo, esta nos Status Aparte. Tambe Rudy a haya e apodo "Motor" ya cu e ta un persona cu su dinamismo y energia ta pone tur cos sosode den forma exitoso.

Si tin un Arubiano cu fervientemente a defende e uzo di Papiamento den tur su aspecto, esey tabata Rudy Croes. Como ministro el a percura pa cambia tur e nombrenan di e departamentonan cu a cay bao su encargo for di idioma Hulandes pa Papiamento.

Rudy ta conoci tambe como hombr'i pueblo, un homber di principio, leal na su pais Aruba y kende a defende semper nos autonomia cu gran fervor y pasion.

Gobierno ta haci invitacion na henter comunidad pa asisti na e ceremonia di desvelo di e borchí di Avenida na honor di Rudy Croes DFM cu lo tuma luga diabierna 8 di november 2024 for di 6'or te 8'or na e Rotonde di Santa Cruz, banda di e cas di mayornan di Rudy Croes.